


Aruba ta den gara di Boston Red Sox

Minister Dr. Richard Visser: "Hopi exito, Xander!"

"Sigui ta un inspiracion pa nos hubentud"



ORANJESTAD (AAN):

Semper ta resalta e cantidad grandi di persona na Aruba cu ta fanatico di New York Yankees y na momento cu Yankees cay afo di un torneo e fanaticonan di e deporte di baseball mes ta sigui e desaroyonan di e resto di e torneo, pero mayoria no ta pone mucho atencion mas. Pero, awo cu Aruba tin nos

prome hungado den World Series, nos comunidad, hasta nos ciudadanonan cu no ta fanatico di baseball ta siguiendo cada wega di Boston Red Sox. Aruba ta den gara di Xander Bogaerts y su ekipo!

Loke ta tumando luga

awendia tabata parti di e vision cu dr. Richard Visser, kende den forma incansabel a promove: Provee e instrumentonan pa nos hobennan yena di talento yega na nan "top performance"; brinda nos hobennan e oportunidadnan y e "support system" pa nan yega na e nivel di deportistanan grandi; reconoce nan trabao duro y esfuersonan y ofrece nan tur apoyo unda cu por presenta oportunidadnan pa nan wordo descubri.

Despues cu Xander a subi veld pa prome biaha durante un wega di Liganan Grandi apenas na augustus pasa, den un tempo record el a sigui demostra un espirito deportivo fabuloso y a capta atencion di fanaticonan na Merca, Aruba y hasta Hulanda, como tambe Corsou. Cada biaha cu Xander su nomber wordo menciona, Aruba su nomber ta wordo carga tambe y ta henter Pais Aruba ta sinti un orguyo sin igual.

Como mandatario encarga cu Deporte, dr.

Richard Visser a biaha pa Boston siman pasa pa expresa su admiracion pa Xander personalmente na e hoben aki di apenas 21 aña, kende tin un enfoque asombroso pa cu su carera. Visser a haya un caluroso bonbini y a disfruta di un tour special di Fenway Stadium, como tambe un combersacion interesante y ameno cu Xander tocante su carera, e emocion di wordo acepta den e mundo di Major League Baseball, etc.

A resalta den combersacionnan cu su coleganan y coachnan cu tin un entusiasmo pa cu Xander y e forma cu e ta desplega su tareanan di shortstop y su actitud. E ta un strea cu tin hopi potencial y un bunita carera su dilanti, ta loke dr. Visser a haya tende di varios di e profesionalnan aki, kende a bira Xander su famia simbolico na Merca y ta brinda Xander consejo, hopi apoyo y animo.

Awe cu Boston tin tres di e shete weganan di World Series 2013 gana, tur hende — incluyendo dr. Richard Visser — ta sinta riba punta di nan stoel wardando pa loke por ta e victoria grandi di Boston Red Sox y nos yiu di tera, Xander Bogaerts.



Minister Dr. Richard Visser ta gradici Xander y su famia cu awe hobennan Arubiano tin un inspiracion, un "role model" mas den deporte y pa demostra na tur hende cu nan por realisa nan soñonan combinando nan talento y trabao duro.

Deporte ta trece union, e union asina desea den tur pais y pa Aruba esaki a wordo demostra un biaha mas pa medio di un hoben cu un smile grandi, kende su nomber ta keda graba den historia como e prome hungado di Aruba pa hunga den un World Series y e hungado mas hoben di Boston Red Sox pa hunga den World Series.

Biba Xander! Biba Aruba! Dr. Richard Visser ta desea Xander y Boston Red Sox hopi exito den e weganan nos dilanti!